

四庫全書

集部

欽定四庫全書

集部

倪文僊集卷

十九至
二十二

詳校官庶吉士_臣陳若霖

中書_臣劉源溥覆勘

總校官檢討_臣何思鈞

校對官中書_臣孫球

謄錄舉人_臣呂日永

欽定四庫全書

倪文僖集卷十九

明 倪謙 撰

序

贈都憲王公詩序

都察院左副都御史王公公度二親相繼早世皇上御極之初嘗推恩賜勅贈其父為給事中母為孺人矣又三年復賜誥加贈父為僉都御史母為恭人公思欲錄

黃燎告丘隴時奉勅總督江淮漕運撫巡畿甸郡邑屬
頻歲河決為患水旱饑疫相仍民生寡遂公勞心焦思
方務築塞賑卹未敢言私今年為患者已息相仍者已
蘇時漸康復歲之秋仲還朝議事始疏其情上陳乞歸
展墓皇上若曰朕倚卿以國計之重民務之殷而卿眷
念桑梓孝誠可嘉事畢卿其速來以副朕望於是錫楮
幣為道里費俾乘傳歸以寵榮之恩至渥也陸辭朝之
公卿偕同年諸君咸賦詩為贈而授簡於予以敘之予

以謂君子盡心王事不以私而害公者急君之義也報
本反始必先公而後私者厚親之仁也孟氏曰未有仁
而遺其親者也未有義而後其君者也忠孝盡於君親
而仁義之德著矣非公之謂乎公之先湖南人移家河
州早遊庠序以明經領薦陝藩擢魁春官為名進士拜戶科
給事中進僉憲再進今職其在朝也數上書論天下事當
鑿輿北狩權姦誤國則奮大義以快衆心及外蕃犯順提
兵追擊拒扼邊關則揚天威以挫勍敵其奉命以出棹

災卹患還定安集則化凍餒為飽煖轉呻吟為謳歌民
賴全活者以億萬計有優為之材而又有剛大之節果
何為能然哉蓋公性資英邁識達政體其浩然者有以
克於中故表然者有以著於外也是浩然者在天為景
星為卿雲在地為醴泉為朱草在物為麒麟為鳳凰人
爭快睹之而鍾之於人則為雄偉不常之器皆是物也
公得於是者獨厚是以發為事業磊磊落落功施於
社稷澤被於生民豈惟天下想聞其風采而名之傳

諸後世垂諸簡冊可得而泯也耶公之歸展敬親塋龍
光輝赫照映泉壤邦人必皆歆豔歎慕以為西河
之間前此未有也予以見皇上體人子之心而遂其孝
而公之德實足以承之所謂非閭里之榮邦家之光者
也故予樂為天下道之若夫遄歸就職仰承睿旨此公
之志也而詩已具矣茲得而畧焉

送王公珮歸侍詩序

太醫院士松月王先生正統間以老謝事其子公珮自

淞來京代之先生獲歸佚於鄉余時恒於士大夫所會
公珮接其儀度言議雅愛重之以為若公珮之才宜就
儒業以出足為天下用乃羈於醫曷克展邪及其卜鄰
甚邇朝夕往還益洽然後知公珮幼從內翰楊廷端先
生游學有授受為亞卿周公侍御趙公郡博孫公所器
待咸欲舉入郡庠而公珮亟以代親為事不果其孝可
嘉矣公珮攻書喜吟詠每偕二三友過予靜存軒中篝
燈夜酌輒投壺聯句以為樂酒酣奇語疊出拊掌諧笑

興意洒然胸中抱負何如也見予鄙作必加賡和頃刻
數十篇不厭睹其詞鋒差差余固斂鍔之不暇也景泰
改元公珮隨王師往平閩寇而余亦乞假歸省遂爾闊
別明年予還朝又明年閩師始班公珮以功授醫院幕
職食其祿不事其事乃復胥晤暇即尋盟過從情好固
不異於疇昔也茲公珮念二親衰暮久曠定省得請于
上翩然戒歸余性木鈍不能俯仰與世諧賴公珮不鄙
棄予今其歸矣則酬暢之樂誰歟望之及思公珮始之

遺外功名甘就醫業者既為親而出今之登名仕版思
盡榮養者復為親而歸一念之孝始終在親予敢以朋
友私分悵悵於其去乎於是舉觴餞之而歌以侑觴曰
南風之薰兮三泖波九峯無雲兮鬱其嵯峨君茲歸止
戲綠服而進春酒兮親亦怡止髮皓而顏酡燕喜之樂
兮奈爾何朝家需忠賢以翼理兮惟孝之求豈容君兮
抱道不試而遠遊車載脂兮馬就服君來朝兮吳淞不
可以久留歌竟在坐之賓咸歌詠以餞之命予序之然

必及夫交誼者以見公珮與予斯文之好若此也

贈內翰戚文湍序

古人論不朽者以立言與立德立功並稱故君子道明于已而不獲見諸行事則必立言以垂後若史氏之職是已三代以上之史即詩書春秋皆經聖人所刪定不可尚矣秦漢而下其英君誼辟之盛德大業賢臣名士之豐功偉行與夫一代典章法制之施理亂汙隆之跡使後世得以究其顛末詳其是非逮今久而彌彰者不

有賴于史筆之存也耶使無載言之筆雖功高德懋孰
為傳而有聞乎是惟言不朽乃功德所由以不朽宜其
稱之並也以立言為職者其重且要不亦明甚矣乎今
之史職在翰林曰脩撰編脩檢討朝廷於是職必慎簡
甲科文學之士以充而餘姚戚君文湍獲拜翰林編脩
蓋出於慎簡也文湍自幼侍親宦途夙承家學性精悟
不凡年十五六時操筆為文章雄詞麗句已累累不窮
比弱冠其辭益騁若百金駿馬追風絕塵逸氣橫出蓋

其得於天是以過於人也予每期文湍之才足以魁多
士居翰苑而無媿其後出領秋薦果登進士高第選翰
林庶吉士被擢為史官竟如予之所期但少歎於魁名
耳茲文湍既陟清華禁近之地任立言要重之職則纂
述鴻猷鋪張盛化褒功贊德著於簡冊以傳信於天下
後世者固朝廷所望於文湍者也而無識者類以閒冗
視之尚曷足與議也哉顧予學殖荒落亦嘗職立言而
不知所以言以今觀之增愧於文湍者多矣然則文湍

善培積而不已其嚮往可勝既乎太醫院士滑志庸君鄉人也榮其拜命來需贈言予與文湍交最久知最深故喜一道之以見朝廷用賢當其才而且為吾黨賀也

贈刑科給事中王君序

給事中言官也以諫爭封駁糾劾為職在昔諫議拾遺補闕即其任也古者諫無官工誦箴諫瞽誦詩諫公卿比諫士傳言諫庶人謗於道商旅議於市上自公卿大夫下至士庶工商無弗得諫者漢唐以來諫官始有定

員以天下之政四海之務得失利病萃於一官使言之
其任不亦重乎是以天子深居九重而耳目所及罔不
周知者由諫官以言之也為是官者必練習憲章明達
治體有長慮却顧之識存忠君愛國之誠袞職有關
則犯顏而不難大臣有失則直指而不忌誘以厚利而
不動臨以白刃而不懼然後為有以盡其職也易曰王
臣蹇蹇匪躬之故斯之謂已雖然進言固難而納言尤
難鴻惟皇上言路大開納諫如流為言官於今日者豈

不足以行其志乎瀘川王君廷鑑夙負異姿先君子耕
樂處士朝夕躬課以詩書比長博延名師訓迪故其學
有授受正統戊午領薦而起兩辭教職不就卒業太學
業益充博景泰辛未擢進士高第今年秋拜刑科給事中
君之在太學門下從游之士甚盛乃相率來徵贈言於
余余惟有官守者脩其職有言責者盡其忠官守言責不
得以相侵也然使當責者拱默而不肯言不當責者又
侵官而不敢言將何以善其治乎君抱充博之學有用

世之志茲獲任言責之重際納諫之君則昌言論列而
効蹇蹇匪躬之節蓋千載而一時也蹇蹇之節著則言
之行者道之行也由是善治裨於國家風采振於廷端
尚曷讓古之諫臣也耶昔宋歐陽脩余靖蔡襄王素為
諫官當時重之謂之四諫余於今固有望於廷鑑矣遂
書以為之贈

劉侍御輓詩序

嗚呼此為吾亡友敘珙劉君自新哀輓之什也然縉紳

君子哀吾自新者抑何若是之多耶蓋以自新早失怙恃克篤志力學攻苦澁淡不以祈寒暑雨少懈遂以詩經發解于蜀登正統己未進士第拜官行人九載榮滿薦授貴州道監察御史奉勅諭蜀山都掌夷寇遷秩甫半載高位厚祿未及晉承而遽以疾卒此其為可哀也自新魁岸磊落為行人將命四方擅專對之譽為御史深入賊境曉以禍福諸寇悉降不煩師旅其才畧為甫見弘猷大志未及盡展而遽止於斯此其又可哀也自新

嘗言吾先世以來多不得壽不知吾齡之延否也乃以
山岳名諸子今自新甲子果不及週年僅五十有一其
命矣夫此其尤可哀也自新之可哀者若是則凡縉紳
君子篇連牘累所以悼惜之者安能已於言耶言之發
也人情所同又安得而不多耶予與自新同年舉進士
交契甚厚其子山敘郡薦為陰陽正術以其為世官之
家也山頃來京授職乃以諸作輯錄成編徵為之敘嗚
呼吾尚忍序君茲什也耶雖然世固有躋華陟要者矣其

官資非不高也壽年非不長也至其材德畧不為人所稱甚則詆訾交集在生前且不免焉況身後乎由是觀之則吾自新雖不得隆貴壽於生前而所以壽身後之不朽者固有賴於是編也故不辭而序之使傳焉

清風林詩引

出南京朝陽門外四三里有俞氏文貴居焉文貴維揚人居於是數世矣父彥清偕母氏年垂八十具慶在堂文貴有兄文顯文德文德任南京留守左衛百戶皆敦

睦有行誼豐於貲畜賢而好禮家林有竹數千挺望之蒼
翠翁耨賢士大夫樂與文貴游者恒造竹所嘯詠時或
天風徐來柯葉披靡觸撓參錯播而成聲恍若登有虞
氏之廷聞鳴球之憂擊趨文石之陸聆珮玉之珊珊也
挹之者汗濁為之䟽淪煩囂為之滌齟不惟悅人之耳
而又爽人之神也因名曰清風之林文貴商於湖海心
未嘗不在是林也頃來京師慕太常卿夏公墨竹妙天
下乃持縑素求圖其所謂清風林者而時展玩焉將徵

名能詩者題詠其上以寫其適介秋官員外錢君原博
屬一言為之引惟夫風大塊之噫氣也不自為聲而聲
生於物之所激不自為形而形生於物之所遇故風一也
簸塵沙則為狂鼓濤浪則為怒汎蘭轉蕙則為香是皆
因物而有變也至於竹中虛外直有冬夏不易之節中
立不倚之操物之至清者也惟竹之清也故激之而成
聲遇之而有形而風也亦從而清焉是以人之挹之悅
乎耳而爽乎神徒知風之為清而不知因夫竹之清也

且天下之物可愛者多矣而文貴於竹而植之而圖之而詠之而獨加厚焉何耶吾知其心必窮達不移其守得失不渝其志羣居而不附麗特立而無比周於竹之清實有契焉者觀人之親其德者無不愛而接其儀者無不悅是何異於竹風之相值也耶此文貴所以不他之愛而獨厚於是良有以也詩曰維其有之是以似之其文貴之謂乎昔者吉甫作誦穆如清風今諸君子皆能言之士詩之作也固亦若是文貴披是圖也詠是什

也不知清風之在林歟抑亦清風之在詩歟其所得當益深矣是為引

贈楊郡太守王君赴官序

昔太史公傳漢循吏謂其能奉法循理不尚威嚴故得列於是予嘗思夫代之為理者法而能奉則承流宣化以盡職而非法者有所不為矣理而能循則持廉秉公以守身而非理者有所不行矣如是則德化漸洽而民心悅服又何待威嚴之及哉凡假威嚴以為治而強民

之從者皆不足於理法者也內之有不足而惟外是假
欲臻治理之效不可得也及效之不臻而乃誣民曰難
治豈理也哉揚之為郡介淮海之間自唐以來天下繁
盛之地稱一揚二益人民之夥物產之殷逮今猶然乃
江北一都會也比者郡守以缺聞少保高先生其郡人
也欲得循良之守以惠彼民而素知大理寺副王君宗
貫賢薦之天曹奏于上擢補是缺宗貫陝右三原人中
辛酉鄉試登戊辰進士第選翰林庶吉士日親炙館閣

耆老成人所聞所學皆康時之略聖賢之道尋拜官大理剛毅穎敏著于有為屢平反大獄執議不回無少阿囁今都憲蕭公時為棘寺卿每以第一人稱之其足乎材立乎志者若是宜為少保公所知而擢守大郡也夫揚固大郡也頃因水旱相仍民多告病使或為守者矜智挾私而立威以逞其何以堪之今乃得材足志立之宗貫焉則夫斯往承流宣化持廉秉正惟理法是循是奉蓋可知矣其德化容有不洽民心容有不悅而治效容

有不臻者乎由是豈惟將受國家增秩賜金之褒他日
儻傳循吏又當不後於古人矣君將赴官內翰劉君偕
縉紳徵言以華其行故述期望之意為贈

丹陽董莊睦氏族譜序

睦氏之先望出魯國五季時有睦三府君始自真定來
擇練塘之南句曲山之左居之是為丹陽董莊之睦嗣
武畧將軍鎮江衛副千戶良佐念其先人武畧府君嘗
脩輯歷世譜系未就而沒茲承叔祖伯林景曦二公之

命詳加考訂以睦三府君為始祖其後有遷毘陵者維
揚者茆山者彭橋者甕城者朱巷者石漂者市居者黃
土橋者坊前者凌口者合之為一十九代析之為一百
四十二枝逾五年始克成編一開帙間則上下五六百
年之久昭穆世次粲然有倫俾後之人知本所自出而
篤尊尊之義知支所由分而盡親親之恩其用心亦勤
矣豈非敦本厚倫之士乎譜既成自序以見志復徵予
言予以謂三代世家自得姓受氏有五宗之法以統族

屬故列國皆有本系秦漢以來天下無世卿國滅宗散其法遂廢於是以門地相高而譜牒始興隋唐之時蓋家有譜及五季喪亂相仍散佚者多自是知其本者鮮矣宋興惟歐蘓二氏之譜著稱於世遂為後人之法焉夫世系之自非譜何由而明昭穆之別非譜何由而叙族屬之繁非譜何由而合是宜良佐汲汲於家乘之修而追成先人之志也其孝可嘉矣然其為譜斷自五季而下其上也不敢妄引而強合焉是為得實亦可見其

先世所積之厚故遠而益盛若此也良佐之賢既能承先志以成斯譜為後人者繼繼繩繩皆能心良佐之心以光其族則蕃衍昌大未可涯涘續是而書者又容有窮乎遂為識其左而歸之

潞渚驪歌序

景泰六年八月定襄伯郭公奏臣生三月父喪母守節教臣獲底成立至正統初母喪遺言與父合葬南京祖塋屬有同產兄病不能往權厝西山俄兄又喪七年南征

麓川十四年北征留鎮大同景泰五年召還往返備邊
久未歸葬臣得祿思親不勝哀痛幸賜回遷葬以副遺言上
憫其情許之詔工部為營葬事遣官諭祭有司給驛舟
歸其喪陞辭將行縉紳交游胥與餞於潞河之渚咸賦
詩為贈凡得若干首合而命之曰潞渚驪歌蓋取古逸
詩之義也謂予辱葭莩之末宜敘簡首惟人生大節忠
與孝耳子盡孝於親仁也臣盡忠於君義也仁義脩而
君子之德立公世家臨淮大父營國威襄公從太祖高

皇帝削平宇內為開國元勳男尚貴主女侍椒房一門
貴顯世莫與倫公為戚里貴游器宇瓌傑材識英邁而
能折節事學書無所不讀發為詩文清竒雅贍膾炙人
口是蓋有得於天而非積習所能及也自洪熙初宿衛
禁庭立朝幾二十載才不少試既而仗劍臨戎南征北
討始克展其將畧累樹戰功用致茅土䟽封河山入擔
時族嗣侯方有酎金之失公不藉梯媒復起而得之龍
章褒錫貤榮祖禰非忠盡於國曷能爾乎茲復拳拳以

繼述為心念母夫人顧言力襄大事不遠千里奉其體
魄祔於祖塋非孝盡於親曷能爾乎忠孝兩全大節以
立君子之德莫有逾於此者矣然朝廷於公顧遇至渥
今日遂公之孝者又將望公之忠於無窮也昔周宣王
之命仲山甫有曰繼戎祖考王躬是保命召康公有曰
無曰予小子召公是似自古繼體之君所望乎世臣者
盖若此君子不以私害公然則公也豈宜久於去哉予
諗于公公曰唯唯

贈吏部侍郎俞公賜告序

太子少保吏部左侍郎嘉禾俞公以疾在告上疏願歸故里調治詔許之諭之若曰朕久留卿冀疾有瘳而卿固願歸治卿歸宜慎疾自愛務近醫藥疾愈速來輔朕有司其月給米十石初公得疾上數遣太醫來視予善藥逾年不愈公始欲歸上疏不許又逾年疾如初乃再上疏至是始賜告官其一子為給事中俾侍疾南歸公何以獲朝廷眷遇之隆若此哉蓋公以醇實之德博瞻之

學正統中侍皇上於藩邸講明正心誠意之方敷陳堯舜周孔之道朝夕納誨輔成聖德故皇上於嗣統之初進公鴻臚寺丞尋擢少卿累遷至今職方倚公贊理弘猷共興善治公亦竭忠盡瘁展布其才奈何沴氣侵而疾疢作矣孟子曰湯之於伊尹學焉而後臣之高宗命傳說曰予小子舊學於甘盤自古聖君哲后未有不資於學以成聖者是以皇上緬懷舊學恩意惓惓勉其留厚其去而望其來也使公無恙豈宜一日去左右哉宜

其眷遇之隆若此也抑予聞之昔秦少游卧病汝南直舍高符仲携輞川圖示之曰閱此可愈疾少游得之喜甚即於枕上引之恍然若與摩詰入輞川數日疾良愈公之歸故鄉山川歷歷在目睹先世丘隴之所覽童子釣遊之跡其心之喜殆有甚於少游之觀圖者矣疾寧有不愈者乎尚勿藥早來以仰副睿諭之盛心是縉紳之所望也太子少保兵部左侍郎俞公偕諸君子篤僚舊之好屬筆於余以為贈於是乎言

贈達先生赴襄陽教授序

先生括蒼之宦族也始祖哈麻仕元為鎮江路達魯花赤高祖志公為撫州路同知曾叔祖兼善進士及第死節封魏國公諡忠介祖彥廣仕國朝監察御史陞湖廣僉憲父文有隱德不慕仕進日以詩書教子姓以故先生之學得自家傳深有源委永樂庚子以詩經領薦浙藩登甲辰春官貳榜第來教應天府庠宣德初大理卿西昌胡公撫巡南畿大興學校增廣生員謙甫髫年預

在選列獲隸先生講下執經問難啓迪良多方資卒業於朝夕而先生以滿考去矣後聞先生擢教新淦再擢鎮江所至勤於誘掖士子彬彬造就鎮江乃其始祖宣化之地卒葬於此丘隴所存先生因卜居焉先生有三子曰顯曰褒曰鎮皆秀敏克家而顯之子曰穎曰毅性亦聰悟俾二孫俱入郡庠紹儒業今年再以滿考來京將辭老歸於鎮江遂休致之樂天官卿謂其耳目聰明筋力不衰而年且未至不允奏補襄陽教授不日陞辭

將行括蒼新淦以及鎮江諸縉紳慕先生之德咸徵能
文者為序以贈應天諸君子以謂吾輩可無一言矧子
職文辭又在門牆桃李之列欲默得乎謙惟以門弟子
而為文以贈師果理乎哉抑觀古之人於其師言動之
詳必謹錄而識之不特孔門為然則文以贈之蓋亦理
也先生性溫厚坦易執禮恂恂然甚恭遇義舉則毅然
不讓為文不事絺章繪句必傳於理教人隨其資稟高
下訓諭之皆有所得存心介特一毫無所苟取此其槩

也故其三歷名邦前後三十餘載道化日孚德譽日廣
豈偶然也哉則夫先生斯往襄陽士子固知坐於春風
中矣謙不佞因述先生言動之槩為贈用附於古人謹
識之義云

盤泉詩集序

詩者言之有音節者也言之有音節一皆本於自然而
不容已焉若康衢之謠擊壤之歌二南之詠是皆髫童
野老委巷女婦達其情之所欲言者初豈有意而為之

哉以今觀之雖學士大夫反有所不能道何耶由其被先
王教化之深而發乎天性之真者自然而成音也後世
之為詩者養之未至而欲模擬古作極力馳騁排偶聲
律風雲月露以為工牛鬼蛇神以為奇而古意索矣惟
陶韋之冲逸李杜之典則膾炙人口世爭傳誦之以至
於今豈不以其音節自然有得於風雅之遺者乎盤泉
先生名實字篤恭姓李氏盤泉其別號也先為豫章人
九世祖始徙豐城先生生而長身美髯居家孝友早從

鄉先生朱至貞遊刻志問學授徒於鄉不慕榮進永樂中郡守以秀才薦起之理刑憲臺拜河南盧氏丞持身廉謹有惠愛之政後謝事歸以壽終平昔喜吟詠每有所得輒形於詩詞達而止不事絺章繪句然惟以自適多不存稿其子太平知府若虛掇拾遺墨僅得若干篇彙萃成帙凡古選歌行近作絕句諸體畧備所謂存十一於千百者也以予有同年之契屬為校定既刻諸梓復俾予序之予觀先生之詩冲逸而不窘迫典則而不

奇詭有和平自然之音無模擬馳騁之態蓋涉陶韋李杜之蹊徑而上追乎風雅者也考其所詠或酬答親友或紀述宦遊或寫已懷或勉子德無非天理民彝之懿而其操履之端學術之正涵養之厚居然可見得不有傳於世乎孔子曰有德必有言於先生信之矣若虛以名進士出守大郡文章政事卓稱於時嘗荷推恩贈先生為兵部主事茲復圖其不朽者如此是則仁人孝子之用心矣遂忘其謏陋而序於篇端

贈夏文振序

易曰上古結繩而治後世聖人易之以書契百官以治萬民以察蓋取諸夬夬揚于王庭其用最大也故周官保氏掌養國子則教之六書書必同文漢制太史試學童能風書九千字以上乃得為史又以六體試之課最者以為尚書御史唐則有明字之科墨試說文字林通者為第古之重字學也蓋如此詔今之出政事之紀道德功業之載制度文章之述率惟字書焉是賴可不重

乎使作字者或體有未精義有未究而弗得其法則其所書非謬必俗烏能布諸簡冊而傳諸天下後世哉是以國家慎重其選凡貴遊子弟能攻字書者俾入綸閣以精習之俟三載業成授之以職蓋即古昔教試之遺意也崑山夏文振氏乃今太常少卿仲昭先生之季子也先生早以高文碩學登進士第入官翰林以精字學選書聖製太宗文皇帝愛重其書嘗面加獎諭示為人法於是先生以善書名天下文振秀穎超特篤志儒業

讀麟經究褒貶之旨暇則操觚染翰傳其家學體義兼
精波礫有法字畫道美無謬俗之弊今年秋時當大比
以侍父官舍不獲還鄉就試上章乞習書翰苑以便孝
養試之入第詔允其請交游咸以為榮徵言以贈惟夫
自古專門名家匪獨經生學士為然字學亦莫不然也
故以王逸少為父而有獻之以歐陽信本為父而有通
以米元章為父而有元暉以趙孟頫為父而有仲穆世
遂以二王大小歐陽二米二趙並稱茲非名家者乎今

先生既以善書名天下而文振復起而濟厥美不日業成致有祿位于以粉飾絲綸黼黻皇猷以揚于王庭則南橋北梓聯芳禁闥世之稱詞者夫豈獨專於王歐米趙也耶庸書以贈

倪文僖集卷十九

欽定四庫全書

倪文僖集卷二十

明 倪謙 撰

序

贈都督趙君叅戎宣府序

正統己巳秋邊塵弗靖今戶部侍郎楊公時為翰林侍
講奉勅假御史職往山東糾率義旅以備非常尋召還
朝與予論及山東帥臣亟稱都閫趙君良佐之賢不容

口敦詩說禮善於用兵有折衝尊俎之風予心識之未
幾良佐來京備禦胥晤於侍郎公所目其儀度則詳雅
而不矜肆耳其言議則忠信而不回遘探其氣略則振
邁而不萎藹蓋將才也始信侍郎公之言不誣景泰甲
戌秋朝廷知其賢賜勅俾協贊果敢營軍務君制馭有
方兵校悅服今年秋宣府左叅以缺聞朝廷謂惟君可
當斯任遂擢署後府都督往補之鎮守懷來永寧等地
實遴選也夫錐處於囊其末末有不見鐘考於簏其聲

未有不宣君惟抱負之在內者有素故其材美外見聲
譽外宣自有莫之能禦者是宜峻擢之加有以簡在乎
帝心也蓋君世家鳳陽曾大父某從太祖高皇帝起兵
削平海寓累功都指揮同知伯父德勝官至大都督封
梁國公配享仁祖廟庭父某任都指揮分間山東君幼
嗣為指揮使用太子太保吏部尚書王公薦亦陟父秩
其傳珪襲組固有以見其世澤之遠而振拔有為克光
先烈則君之所自致也今往叅機畫發謀出慮詰戎慎

守內衛京師俾同磐石之固外禦侵侮俾絕烽燧之警
此則國家所望於君者然也爾公爾侯河山帶礪所以
酬君之勛伐者得不有見於他日乎君陞辭戒行縉紳
咸燕餞之而屬予為之序行矣良佐尚懋之哉

故工部尚書周公輓詩序

天啟國家興隆之運必篤生俊偉非常之材以輔成鴻
業若詩所謂降于卿士實惟阿衡保茲天子生仲山甫
是也故其存也人仰之去也人思之歿也則又皆哀傷

悼惜有不能自己焉孔子曰吾惡夫涕之無從孟子曰
哭死而哀非為生者是哀者豈有所勉而然哉情之感
者深則哀之發者甚也昔子產之歿鄭人為之巷哭叔
子之歿西州為之罷市蓋以是夫廬陵周公當太宗文
皇帝龍飛之初策名進士與曾榮等二十八人進學翰
林為庶吉士授刑部主事進員外郎越府長史奉勅巡
撫京畿擢工部侍郎進位尚書歷事五朝幾五十載璽
書褒異信任日隆懇以年至乞身歸老歸再逾年以疾

卒訃聞上悼惜命有司營葬事再致諭祭賜謚文襄公
卿大夫相與哀於朝農工相與哀於野商旅相與哀於
塗而東南之民相聚而哭有失聲者焉公何以得此於
人人哉蓋以公負博瞻之學溫純之德卓越之材所謂
俊偉非常者也平生事業皆煥然可述而巡撫之績為
特著所至鋤強植善興利除弊其理經費常賦既足而
餘糧充羨以之賑饑奉公天灾流行而民不憂利役繁
興而民不擾脩廢舉墜百度惟新而民不知所出功施

於國家惠洽於黎庶豈惟東南列郡仰之如神明戴之如父母而公卿大夫莫不挹其仁風而景其賢範焉故於其謝事尚惋惜公以為何可一日舍斯民而去既其去也東南荐饑無術以救尚望起公以為必有通變活民之方豈意公之歿乎宜乎哀之甚也哀之而有言言之而成章公冢嗣仁俊輯而錄之屬謙為序嗚呼上天生公實以資於國而國家用公足以盡其材高位榮名保全終始豐功盛烈垂休史冊可無哀也而公卿大夫

猶哀之甚何邪誠以公為國之股肱民之山嶽老成凋謝不可復得而情之所感有不覺其詠歎之深焉皆為國哀之為民哀之而非出於一人之私者也哀不於私情而益有以見公之德之盛詩既就編遂歎歎而為之引

都門送別詩序

君子之去國也哭於墓而後行所以傷丘隴之無主也一旦得返故園復守塋域以盡餘齒得不為人所慶幸

哉淮南羅禮文甫文節其字草亭其別號也以文學名
淮海間士大夫識與不識皆知之曰草亭先生儒者也
多遣子弟從之游文節古貌癯然而惟道腴是味惇德
飭行清約自守俄有以疑似之迹誣之者文節弗與辯牽
於吏議謫戍遼陽文節長嘯就道畧無愠容遼陽地邊
奚霽女直斥堠彌望鎮禦皆猛將獷卒日尋干戈以備
不虞聞文節名咸尊敬禮下之罔敢辱以屬凡有邊務
輒就與謀議文節為籌畫悉中冑繁則又皆曰草亭先

生吾師也居遼數年其道益顯聖天子臨御之秋大沛
恩澤凡臣民坐累戍邊者悉復其職業文節蒙是恩獲
解戍過闕祇謝南歸東甌襄武王孫錦衣揮使湯公讓
與文節有斯文舊好合縉紳賦詩以壯其行積之成什
題曰都門送別詩而以首簡授予予以謂貧賤得之不
以其道惟仁者為能安之是以處困而亨阨窮不憫盖
無入而不自得也文節橫罹非辜自樂境而涉畏途在
他人鮮不至於怨天而尤人矣文節乃能隨遇而安悠

然自得非確然有守能若是乎宜其德之孚於人也昔
漢管幼安嘗避地遼東操尚聞於海表以司徒華歆薦
遂徵還郡文節德孚海表獲宥而還殆無媿於幼安以
公讓為知己寔有過於華歆用是交相詠歌以貺行李
為公讓者豈無意於文節也邪文節斯歸展墓而入其
樂可知顧其裝橐珠聯玉綴行色粲然可謂不落莫矣
遂不辭而為之序

高氏世譜後序

名宗鉅族莫不以賢子孫而盛以乏賢而微其所以盛者由其積德累善慶澤深長奕世濟美繼繩而不墜也四明高文正氏其先汴人始祖瓊仕宋真宗朝景德初契丹入寇上幸澶淵瓊扶輦渡河卒摧醜虜康靖宋室授檢校太尉封衛國王諡烈武功既著於朝廷有子十四人皆教以詩書至仁宗嘉祐英宗治平之間登用羣賢輔成盛治德復深於天下其開於先者如此故其後賢振振疊出陟武階升文資建功樹業者前後相承與

宋終始宋祚已訖族屬散居四方而寓居四明者為特
盛有號唯菴老愚者嘗譜其世次始自烈武至文正凡
十四世越四百七十年昭穆之序秩然有倫文正寶而
藏之以求予序予聞昔范白歷陳其族而魯叔孫豹以
為保姓受氏世祀之不絕不若立德立功立言之不朽
高氏之先功德之隆固已光啓後祚為子孫者允能立
德立功立言以亢其家則不朽之實得不益遠而益盛
乎尚懋之哉遂以是書於後

張怡筠壽像序

冬蜡月初吉內翰錢先生携酒肴過余為壽且持怡筠肖像展示余曰此姑蘇張君廷義之容也廷義世居閬門西積德尚義嘗輸粟賑饑奉勅褒旌受命服之寵昆季五人行敦雍睦二親早世祖父壽九十餘康寧在堂胥極孝養罔或違缺余雅重其為人頃以此像詣余請益曰年近知非之歲願有言以教我余與廷義交莫逆無能為教敢轉以請亦將以為廷義壽焉余以謂廷義

德進知非固已覺今而悟往矣余方混混於是非之途
亦欲就先生而請益顧何以為廷義告哉雖然莊周氏
有云身非我有是天地之委形也人生寓形宇內耳目
鼻口雖堯舜無不與人同獨全其性分所有而積中發
外之容則曷然與人異耳故君子道德之蘊畜於已者
既盛則英華暢達其睟於面盎於背施於四體者亦皆
出乎自然而無所勉夫豈常人所可及哉今觀畫工之
貌怡筠也置身翠壁叢篁間我冠襖衣坐閱經史風采粲

然于以狀其抱石之介全竹之貞所謂不惟得其形似
兼得其神氣性情者也余雖未識廷義即是而觀豈非
有德之士乎有德者必得其壽將不如石之不可磷竹
之不改色乎昔蘧瑗行年六十而化宣聖七十不踰距
尚父八十陳丹書衛武九十著抑戒年彌高則德彌邵
廷義希是以勉其為德也寧不與年偕進乎余敢以是為
廷義告第余尚少廷義數歲也庸安知余言之非非乎先
生以為何如

慶孫母董太夫人壽九十序

太夫人董氏乃奉天朔衛推誠宣力武臣特進光祿大夫柱國會昌侯孫公之尊壺聖烈慈壽皇太后之母也皇太后誕育聖躬續承丕緒康靖家邦復正宸極功德隆盛亘古罕倫皇上志篤尊親爰伸公義於歲首端月之良恭率羣臣拜上徽號大孝聿昭輿情允愜而太夫人高壽適當九十身際太平之昌運目睹曠世之盛典心益怡樂體益健強耳目聰明飲食加進蓋不知閱世

五百四十甲子矣太夫人有子五人曰繼宗嗣會昌伯以翊戴功進侯爵曰紹宗曰顯宗曰續宗俱錦衣衛都指揮曰純宗指揮女六人孫男十人曰璉指揮曰瓚曰珍曰玪曰璘曰理曰瓏曰瑤曰瑛俱千戶曰璟尚幼孫男女十人曾孫男女六人諸子若孫皆謙恭謹厚孝養備至慶太夫人壽躋九十日擊鮮醢酒以次捧觴升堂為壽太夫人亦樂為之酬恩光慶澤萃于一門噫何其盛哉拜慶之頃不鄙命謙為序以致頌禱之意謙惟本

大則末茂源深則流長故有非常之德必享非常之福也太夫人出自名門來嬪華族克相君子內行純備德善既厚祥祉自臻用致篤生母后備任姒之聖訓成子姓著陰樊之賢翟第在堂金貂繞膝肴核旅陳絲竹迭奏富貴尊榮登于壽考洪範五福太夫人寔全備焉豈非古今之所僅見者乎稽諸禮九十者日有秩君命使人受飲食不離寢天子欲有問焉則就其室以珍從所以致尊養之義也此隆古禮待人臣之老者若是況在

母族之至親者哉是以皇上於太夫人眷賚便蕃中使存問者不絕於道尊養之義匹休往聖而又加封誥命極其優崇有端淑恭慎慈懿靜專德著閨門儀于宗黨之褒大哉皇言固有以深知太夫人之所積者矣皇上推睦族之仁諸子若孫克盡承歡之孝太夫人之壽算延長自是越百年而往誠不容以數計之矣其享非常之福也不亦宜乎謙敬拜壽筵無能為辭嘗聞閼宮之詩有曰俾爾昌而熾俾爾壽而富黃髮台背壽胥與試

俾爾昌而大俾爾耆而艾萬有千歲眉壽無有害謙不
敏敢誦是詩以致頌禱云是為序

贈南京禮科給事中白君序

常之白君廷儀以詩經登丁丑進士第逾年拜南京禮
科給事中內翰王君廷貴合同鄉之士謁余言以贈余
以為今之六科即古之門下省也其屬歷代不一有侍
中給事黃門侍郎納言諫議拾遺補闕諸職掌獻納諫
正奏覆審駁之事若給事中者秦漢以來專掌顧問應

對以有事殿中故曰給事中隋唐以後始移門下以省
讀奏案駁正違失至國朝並廢省職設為六科每科有
都給事中左右給事中給事中凡三等不惟職司封駁
而諫正糾彈之任咸歸之則是一官而兼衆職矣職
分者事寡職兼者事劇則今之給事中視古不亦重乎
南京國家定鼎之都也百官有司咸備自鑾輿北駐天
下奏章悉達帝所而南京六科無事封駁科務稍簡於
是每科特存給事中一員以總之雖不事封駁然或朝

廷政事有闕失皆得以諫正大臣百官任非其人皆得
以糾彈也則是以一人而具衆員矣員衆者事易員獨
者事難則南科給事中視今不亦尤重矣乎廷儀當英
妙之年負敏贍之學一出而角藝文場輒能策名甲第
蜚聲于時及謁銓部職清地禁復登近侍之列則茲往
南科居兼職獨員之重亦將何以舉之乎蓋廷儀宦學
相承世父叔瑜嘗由永樂甲申進士改庶吉士亦拜禮
科給事中父道英以鄉進士任大冶教諭則廷儀憲章

之練習詩書之講貫耳濡目染得於家庭者有素矣余
知廷儀茲往諫正糾彈必能慎重自持進竭忠讜務裨
治理以舉其職豈若窮鄉新進世務未更之士立名好
異觀望喋喋以撓政事者哉昔司馬溫公嘗謂言官當
以三事為先第一不愛富貴次則重惜名節次則曉知
治體以廷儀之賢殆無愧於斯言也名位之進此其基
焉可不勉哉是為序

贈南京兵部侍郎李公序

昔有周既定都豐鎬復營洛邑以朝諸侯是則東都西
都之制從古為然我太祖高皇帝龍飛淮甸削平四海
以金陵形勝甲于天下爰定鼎建為京邑城闕之壯廨
宇之華制度周密規模宏遠逮我太宗文皇帝入正大
統益加修飾翼翼濯濯罔不大備永樂中車駕北巡肇
建宮闕廨宇於行在設官授職悉如京邑至正統中乃
革行在為京邑而以京邑為南京於是兩都之制始定
朝廷以南京為國家根本重地凡六卿之缺必慎簡宿

德重望之臣以任之蓋將以鎮安宗社而彈壓乎人心也況六卿之中司馬尤重叅畫戎機申嚴武備又必得達時知變之材然後可恃以無虞也簡任之際可輕乎哉肆惟皇上光復寶位綜覈名實式序在位而於南都六卿尤注意焉進退之間務在得人故今一時所任皆老成忠義之士今年南京兵部右侍以缺聞皇上命簡於吏部而僉議惟南京通政叅議李君為宜朝廷遂擢以是職齎牒畀之然必以君為宜者蓋以君之祖某嘗以

誠篤之學高明之識事我文廟自侍從登銀臺拜禮部
侍郎著聲於朝而君以名進士起家給事黃門亦登銀
臺文學政事無忝乃祖則其名位固宜繩其祖武也且
其歷官既久德聲尤著既負宿德重望之雅復懷達時
知變之材則司馬之任非君宜任而孰宜乎嗟夫世宦
之家父子祖孫固有俱顯達者矣未聞祖孫歷官名位
相埒若李氏者也是固本其世德之昌而國家化育人
才之盛亦於是而可見也可不勗勉厥職以圖無負於

卷二十
縉紳之所望朝廷之所恃乎初君拜命未幾伏遇萬壽
聖節拜表詣闕將還通政張君允中相率賀之以予亦
嘗為僚也屬叙以贈君名震字用初永平人

贈浦城醫訓潘廷瑞序

浦城潘壁廷瑞乃江西撫州太守至善公之孫鴻臚少
卿文錫公之子應天府學教授節菴李先生之壻也節
菴以高文碩學厚德雅度表儀京庠為多士所愛慕余
時親炙講下深承禮待異於諸生而廷瑞居節菴貳室

與其內弟公器皆妙年負英資篤志問學節菴遣從余
同憲友王文通習舉子業獲連硯席而二君不鄙膚謏
就相資益乃朝夕相與講明經訓之奧商訂文義之疵
相得甚驩由是節菴凡有曲讌酬勞文通必召余與偕
後鴻臚病沒廷瑞以憂去節菴秩滿公器以隨侍去遂
爾相別然相憶之情恒惓惓也正統中余以領鄉書北
上成進士承乏詞林雖與二君南北相違而音問往還
相續每開緘見其手札宛然如接顏面也意期二君必

裒然取科名以出然皆才立無他兄弟備養用是力學
以侍親若將終身焉廼者邑之醫學訓科缺員而廷瑞
嘗旁通醫經脉訣著活人之譽僉以為宜乃薦其名於
朝廷瑞因趣裝來京始獲胥晤宦邸以二十載相違之
久而遂一旦相叙之情其樂為何如未幾廷瑞就試醫
院中式詣銓曹奏補前職別余南還不可無一言以贈
乃告之曰士君子出膺時用者率皆遠去鄉戶仕於外
方廷瑞之拜官也獨能守其丘隴田廬之舊一可慶也

列于庶位者率皆身親案牘政務惟繁而廷瑞之蒞職也獨能施其醫藥利濟之仁二可慶也挾是二可慶者以游于鄉容可怡慢以怠事高滿以凌人乎尚益恂恂恭慎謙巽自守以常保是慶庶身修職舉德成名立以無忝父祖家聲顧不韙歟此余因疇昔之好用敢致箴規之義若是歸見公器為我謝曰明天子在上可以躋祿仕為親榮矣廷瑞瞿然曰敢不承教遂書以識別

送延平教授呂先生序

延平閩之大郡也山水為東南最其靈秀所鍾大賢君子疊見往昔若中立楊先生者北從明道程先生之學於潁昌升堂睹奧號稱高弟及歸明道語坐客曰吾道南矣後先生倡道東南及門之士潛思力行任重詣極者則有仲素羅先生仲素傳之愿中李先生愿中所傳則考亭朱夫子也故論道學淵源必以濂洛關閩並稱而閩學之盛莫逾於延平也今天下之士讀聖賢之書者悉以程朱之說是宗況延平為諸儒講學之地流風餘

韻猶有存者士生其間其感慕景仰希蹤前哲得不倍
於他郡乎會稽呂先生公愿乃宋相頤浩十一世孫也
先君子任南京大理少卿學端行高以古道自居先生
侍側熟聞義方之訓宣德間以春秋領鄉薦中春官備
榜授鉅野教諭秩滿陞淞庠教授所至以啟迪賢才為
務霑化者道融飲德者心醉士論翕然歸之茲以丁艱
起復遷教延平淞庠縉紳暨門下嘗從游者要余贈之
以言余以謂道喪千載而二程夫子始紹其統以傳於

龜山豫章延平則所授業者也二先生每當講誦之餘危坐終日驗於喜怒哀樂未發之前而求所謂中蓋以天下之理胥由此出既得其本而存養益熟然後觸處洞然泛應曲酬而發必中節矣此其學之所得者如此故其接後學答問晝夜不倦隨人淺深誘之各不同要之以反身自得為本也先生司教於諸儒毓德之邦而樞趨者又皆感慕景仰希蹤前哲之士使操於已而化誘於人者誠以二先生為法則道學復明士風丕變茫

茫墜緒得不振起於今日也耶行矣先生予日望之

贈華亭知縣楊君赴官序

余被命在東閣重修天下郡志偶閱淞郡所上志書見其登載名宦不數人而於上海則紀楊尹之績曰尹名昕字某溫之瑞安人以進士舉於鄉升太學景泰二年來為上海推誠感物以廉自信人不忍欺母以就養終昕奉柩歸葬邑人爭賻之不少顧百姓有哭於道而且歌曰楊中堂楊中堂來何遲去何忙又歌曰楊知縣為政

淡然民自便各里聚錢六七萬饋送楊侯侯不盼云余
以謂古之人於去任之際有選一大錢受紙百番以徇
民情者今君乃更一毫不取其廉潔之操殆有過於古
人矣心竊多之時學士錢先生與余同預纂修席相聯
也先生華亭人於上海為鄰封余因舉楊君之績諗之
先生亟稱其賢不置曰是信然也況吾郡之志乃太守
葉公所脩公治行卓越慎許可侯親為其屬使其績果
無可稱公詎冒虛譽之哉然後知君之績蓋實錄也居

無何君以服闋來京適華亭尹以缺聞學士乃舉侯前
績達于吏部曰淞民素慕楊侯使華亭得侯為理民望
愜矣吏部遽以君奏補是缺邑之縉紳皆喜相率徵言
以豔其行惟國家之治天下以安民為本而守令之承
流者以愛民為先愛民之道以廉為要持身廉則心無
所蔽而燭理也明情無所徇而處事也公既公且明民
心悅服其愛之也莫加焉求民不安不可得也昔君之
治上海民固已歌頌其廉今往華亭清節將自是而愈

厲華亭之民又容有不安者乎楊君往哉余恐兩邑之
民有相爭於境上者矣雖然士之廉猶女之貞固當然
也世惟有行虧於閨門節隳於宦途而後貞廉之名始
重朝廷於是褒旌及之祿位加之所以為世勸也君立
志之堅始終不替朝廷將必寵之以顯秩而太史將大
書特書與古廉吏同垂名於信史矣豈特郡志載之而
已乎楊君勗諸遂用書為之贈

贈姜先生典教固始序

鄱陽姜貴憲先生早侍叔父鄧州學正志達先生在官
途漸濡家學時今內相李先生執經就講學行出倫輩
貴憲因與先生獲連硯席有麗澤之益先生尋以所業
擢魁河南登進士高第累官吏部尚書翰林學士入秉
鈞軸而貴憲因叔父解任南還卒業饒庠屢遊場屋不
偶今年始膺有司之貢來京師試高等入太學方得與
先生胥晤叙平生歡契分藹如也未幾以母老在堂陳
辭願就教職得祿以養母詔許之試復高等拜河南光

州固始教諭先生雖欲留之而志不可奪也瀕行交游
大理廷評浦君偕縉紳需言以贈余以謂相業與師道
勢若相懸而事實相資也相為天子用賢於朝廷師為
天子育賢於學校學校有所育而後朝廷有所用師道
有所立而後相業有所成是知學校者賢才之源朝廷
者賢才之流也以位而言固相崇而師卑以功而言則
育難而用易以難易崇以卑易易其事正等耳貴憲之
於內相昔未仕也其業則相資於一已今既仕也其道

復相資於國家夫豈偶然者哉肆惟聖朝以深仁厚澤
化成天下雖山陬海隅莫匪聲明文物所洽矧當中州
之地乎貴憲出自儒宗富於德業今往踐師席正已以
率之盡心以迪之材雖有高下也教則因其所資道雖
有精粗也語則量其所及將見士子歆慕感發充然無
不有得材成德立巍然無不可用不日彬彬接武而出
擢於科目揚于明廷以待國家任使寧不有資乎相業
之成也耶師道之重若此故於茲往特舉相業之等者

以明之貴憲尚懋之哉

卷二十

贈劉少尹赴應天序

太祖高皇帝定鼎金陵是為南京以集慶路為應天府
太宗文皇帝駐蹕北平是為北京以北平布政司為順
天府兩京二府有尹有丞其秩尹視六曹丞視九卿並
以方岳及侍從之臣居之所以重其任也稽諸古周官
有內史掌治京師漢分置左右內史後更京兆尹左馮
翊右扶風是為三輔後漢都雒置河南尹以三輔陵廟

所在不改其號唐都長安為京兆府以河南為東都又增太原為北京是為三都並以親王為牧置尹以貳之各以少尹通判府事宋都汴為開封府牧尹不常置牧以皇子領尹以文臣充又以河南應天大名為南北西京皆置留守其後武林建鄴亦建行宮武林視汴都建鄴視三都並係執政從臣以充歷載以來罔不以是為重誠以畿甸之內輦轂之下百官軍民萃焉四方萬國瞻焉匪得聞望素著為縉紳所推服者以居是任曷以壯

國本而慰民情也哉朝廷授任之際必慎加簡拔而未嘗輕以畀人為是故也刑科掌科事給事中劉君洙茲被擢為應天府丞盖出于慎簡者也君廣信之貴溪人尊甫先生嘗典維揚嚴郡姑蘇三學之教啟迪有方士風丕變君随侍左右過庭之訓漸濡有素用是德崇業廣以書經舉江右鄉試為第一人登景泰辛未進士第拜給事中封駁章奏無所違失出使暹羅涉歷鯨波不避險艱布宣聖德得將命體使還進掌科事未幾擢丞

應天夫府丞古少尹也給事國侍從也以侍從而居少
尹固為宜矣況君簪筆螭頭觀風海外其德望素為縉
紳所推服也哉則茲往也尚念朝廷簡拔授任之意若
是其重展布弘材以贊庶理俾朝廷之基業益以固京
畿之黎庶無不安則國本得不賴之以壯而民情得不
賴之以慰乎予郡人也喜吾民之得所賴也於是合諸
君子餞君之行而僭為之序

倪文僖集卷二十

欽定四庫全書

倪文僖集卷二十一

明 倪謙 撰

序

順天府鄉試錄後序

國家立賢無方廣延英乂於開科取士不惟簡拔於學
校凡貴游民秀兵校史胥皆得抱藝來試誠欲盡天下
之才慮有遺珠之惜也士生斯世抑何幸與天順己卯

秋適當大比太學及畿內士就試者幾三千人盛矣哉
順天府以考試官上請皇上以命臣定之臣謙因頓首
受命恭詣試院悉心簡閱以承休德得文之合矩度者
一百三十五人遵定額也鄉試錄成故事宜為後序臣
惟人君之馭天下未有舍賢而能治者粵昔賢才之盛
稱稷契繇益周召畢榮其謨訓功烈亘古鮮及者由有
堯舜文武之君作之於上也我國家自太宗文皇帝建
都於斯氣運隆昌克生多士列聖相承甄陶教養蓋已

有年故自永樂開科以來所得之士出學校而登天府者豈惟一時扶景運翊鴻猷佐成太平之業迄今允賴其用焉則今日所得者又有以匡贊億萬年之祚於無疆也匪作之有道其何以致是哉然考試惟取其文所蘊由之以得何則文者德之華也如山焉上有丹砂者下有金上有陵石者下有錫如水焉圓折者有珠方折者有玉孰謂觀於外之文不足以知其中之抱負乎故策名是錄者皆抱負之卓然者也肆惟皇上崇儒右文聘

召遺逸躬親萬幾懋圖治理聖德之隆超軼堯舜文武
矣凡在四海之遠尚皆作於聖化矧京輔之近者哉譬
則日之升暘谷先被其光江之流峨岷先霑其潤則人
才獨盛於斯宜矣諸君子由賢科以升幸遇大有為之
主行將角春官對大廷釋褐登朝可不勇於自勵乎先
儒謂豪傑之士由科目以進所謂豪傑固不以一得而
自足也天之賦於我者大矣充之盡其道養之得其義
足以運陰陽而順四時輔天地而遂萬物道濟天下而

不以為德澤被後世而不以為能寵辱臨之而不驚利害迫之而不變若是者豈徒然哉由其不安於小成不誘於近利故能就大器而立遠功也夫然後可謂豪傑之士矣可以與稷契繇益周召畢榮並驅而爭先矣使得魚兔而忘蹄筌以是自足而不知所以自重人將謂之曰古今人不相及者若是豈不孤皇上求賢之盛心也耶願與諸君子共勉之

潞河讌別詩序

皇上復辟改元之初以太常少卿陳贊先生久典明禋祇慎共職賜誥命以寵榮之追贈其考吏曹郎中公如其官先生尋以年逾六袞上疏乞身上謂其精力尚強勉留視事越明年重憫其老詔始許其歸適其子給事中世用奉命使海外國因得侍行朝之縉紳莫不咨嗟歎慕以為朝廷得優老之道先生遂退休之志而給事遇偕行之榮於是相率載酒設供張譙餞潞河之湄又各著為聲詩以頌其美酒既行有議者曰先生年未

七十學問老成居容臺清華之地遠政府繁劇之勞豈容去乎或曰先生素安恬逸遺外聲利與其戕冠鳴玉之檢束孰若杖藜製芟之逍遙也與其驅馳埃壘之間孰若嘯傲烟月之表也此其去也余曰不然君子幼而學壯而仕老而休皆順夫自然之理而已是以七十致仕載於禮著於令古今所同在上者不强以事以盡為君之仁在下者不貪其位以盡為臣之義君臣交致其道進退各得其宜斯為美也議者之言豈知先生者哉

且君子全名為難全節尤難常情孰不思有立於壯盛之時鮮有不少變於晚暮之日若先生者早以明經薦授杭郡文學造就有方為藩臬重臣所器待請總脩浙省宣廟實錄秩滿來朝選入翰林為待詔日直內禁進典籍再進五經博士文章著述傳播四方用薦出叅廣藩當海寇繹騷盡心拊綏民多感化未幾入居奉常叅總禮樂著寅清之譽敷歷中外始終無疵可謂能全名矣茲又知止足之戒不待年至奉身引退可謂能全節

矣名節兩全不易所守賢於人也不亦遠乎則先生
茲去不特可為縉紳之楷式而鄉邦賢士大夫歆其風
槩子弟接其儀刑抑又足以敦化而善俗矣其為世教
之益不既多乎詩既成題曰潞河讌別咸欲余言以弁
簡端遂不揣而為之叙先生字維成餘姚人別號蒙軒
云

贈于永亨南還序

錢塘有惇本厚倫之士曰于君永亨乃前少保兵部尚

書公之子也嘗與其弟故府軍戶侯景瞻同謫戍塞垣永亨遇宥南還而景瞻獨留馬營永亨不勝白晝看雲之思兩度居庸來視之天順己卯收其先人遺骸歸葬西湖之堧既襄事復念其弟不置北走數千里度關直抵上谷與胥晤於宣城寓館友愛之情藹然可掬雖二蘇夜雨對牀之懽不是過也總戎都閫大臣見其克篤恩誼雅推重之而凡相知者又莫不歆慕其德而嘉羨其賢也永亨茲慮先塋久違歸興浩然於是前錦衣戶侯

楊君廷玉合素所交善携酒殺往餞之余亦在座酒乍
行余執爵而諗之曰人之處世也適樂土者情所欲涉
畏途者情所憚也君已脫畏途而安樂土曷異鴻毛遇
風而巨魚之縱壑也在他人語及舊游必掉頭搖手而
不之顧矣君乃往返於斯至于再至于三而無所憚鵠
原之情果若是其深矣乎永亨曰嗟乎余自幼賴先人
教育以底成立撫愛不翅所生况先人無他嗣胤惟余
與景瞻耳余幸荷恩庥獲返葬先人少申罔極之報至

念吾弟獨謫於斯忍一日而忘於心耶是以亟往亟來
惟見有可樂而不見可畏見有可欲而不見可憚也尚
遑卹其他乎余聞而歎曰噫使天下皆曾閔也則孝友
之名不聞惟於父母兄弟之道有不足而後孝友之傳
始立觀永亨孝於親友於其弟如是謂為惇本厚倫之
士非耶視古史傳所稱可以媲美而無媿矣遂連飲以
數爵余亦樂為之酌瓶罄顏醺抗手而別

北園讌集詩序

天順庚辰夏五端陽日余被謫來宣城僦屋以居有公
事則出應驅策否則杜門守靜以經史自娛宣府前衛
有揮使李君者親賢嗜學辱枉過余數要至其家款待
甚至遣弟經從余受進士業家有園一區在城北門外
六月十有七日李君以時炎酷請余出為避暑之游忻
然命駕偕行者則有故刑部李文盛錦衣楊廷玉朱尚
德府軍于景瞻皆謫寓於斯者也乃聯騎出北郊循城
之濠折而西行僅一里許至園所下馬入園則董揮使

弟珩單揮使弟祥士人姚寬王敏及李君君弟紳經皆已先至園周四十餘畝南面堅墉北負羣山翠屏環抱聯屬不絕有泉出山址自西而來流過園前以入于城引之灌畦中樹桃李數十百株蓊然成列外多榆柳高皆數尋園舊無亭榭君預於林隙張幕除地設几席具壺奕以俟於是解衣盤薄往來行遊或蔭茂樹或閱嘉蔬玩山挹泉惟意所適還至幕下則翠陰滿地坐而行觴饋續芳鮮酒注清冽擇佳實撼樹而墮之浸泉以進坐

久出而投壺觥籌交錯笑語歡洽但覺凱風徐來煩歎
自遠恍然若墮廣寒之窟而濯清冷之淵也一何快哉
既而飲酒樂甚景瞻索余賦詩余亦要其同賦更唱迭
和斐然成章弗計工拙座有為吾慮者曰先生昔居館
閣當以藻繪為業今既罹司寇之議為放逐之臣所宜
省躬緘口庶逭官謗何詩之為余嘆曰夫子愛我良厚
然亦非所慮也昔柳宗元蘇子瞻之謫嶺海也率放浪
山水間賦詠不輟蓋儒者他無所能惟藉文辭以宣煩

而導滯耳矧今四夷向化邊塵不驚而荷戈與役之役
未見及已則余與二三遷客得以遊於此啜清泉足以
沃熱中之懷醉醇酎足以釋鬱悶之思吟風弄月消遣
襟抱何為不可使時有警其能然乎由是而知是遊也
莫非聖德之賜幸而是詩偶為好事者所傳四方之人
有以想見邊亭塞垣人心暇豫有如此者豈不益驗國
家太平之盛也哉衆以余言為然相率屬和或自有作
比日暮盡醉乃各上馬歸明日聚詩得若干首遂次第

成什而冠以是言李君名紱字士章濠梁宦族淳雅有
士行克篤孝友好客之心本其世德云

詠雪唱和詩序

雪之為物當隆冬寒沍之時鍾嚴凝清肅之氣其為形
有霏分六出之奇其為色有瑩白無瑕之潔其為德有
潛消疫沴平治險穢之仁其為功有潤澤土膏覆滅遺
蝗之大故雪以時降自昔稱為豐年之祥而騷人韻士
愛其形色而重其功德者於霏霏雨集之初晴開委積

之頃往往見諸賦詠以形容而頌美之若宋之謝惠連
唐之韓昌黎宋之歐陽永叔蘇子瞻黃魯直諸賢皆有
大篇其他律絕尤多而永叔守潁州約客賦詩至禁體
物語以見其巧子瞻繼之所謂汝南先賢有故事醉翁
詩話誰續說當時號令君聽取白戰不許持寸鐵者是
也余被謫來宣城閒居無事歲十一月六日曉起凝雲
欲同天意釀雪揮使李君士章置酒於家速子與前秋
官潘君時暘錦衣楊君廷玉朱君尚德府軍于君景瞻

高尚董君士珩為破寒之會華筵乍啟羽觴競飛俄六
雪繽紛交錯蔽空而下近則穿簾承幌覆屋凝階遠則
冒隴蒙山縈林晷徑頃刻之間萬里一白士章喜曰茲
非國家之瑞乎不宜無述也於是予與諸君彼此唱酬
各成詩二章予以叙一時之清歡追千古之高興雖不
能效歐蘇二公禁體物之巧至於拊景寫懷而寓夫愛
重之意者則不異於昔人也既而雪止酒闌客皆散去
予退而僭書所詠并序所由於卷以貽士章庶見士章

以文會友之美而諸君之作即各具於左方詩曰

六花庭院舞廉纖吟賞金杯酒共拈素練漸看埋屋角
瑤簪俄訝擁山尖香生石鼎茶初熟暖拂銅爐火旋添
醉後風狂天已霽玉塵飛捲下南簷

遷客何勞賦式微開尊對雪啟重扉鉛華有暈輕盈墮
雲母無聲自在飛酒敵清寒須縱飲詩賡高韻却忘歸
羈懷總為高情散義氣如君古亦稀

知菴稿序

姑蘇韓公永熙正統壬戌以明經登進士高第拜監察御史按巡河上大振風紀鋤強制暴裁處得宜館閣諸先生亟稱公年富才優超越倫行舉其河上所為數事之善以語同列予時在史局親聞其論已知公長於政事而未知其能古文也後公進位都憲出鎮江右得公所作西江詩選序觀之見其議論宏博始知公長於古文而以未獲多見為憾焉茲予謫寓宣城公奉命來理邊政目其剖決庶務隨刃而解規畫事要口占以授書史幾

於腕脫其機警天成非人可及不鄙出其平昔所作知
菴藁見示俾序一言然後幸睹全集閱之連日不厭歌
詠其詩則衆體咸備咀嚼其文則詞致高遠秩然其有
倫粲然其有光渾渾其無疵滔滔其不窮所感者無非愛
君思親之懷所談者無非經國卹民之圖蓋公浩然之
氣養於中者既盛故其所發英偉洒落而光明正大雖
詞林之老於文者未易方駕也豈非豪傑之才聖賢之
學者乎夫政事文章非二道也公之文章得韓文公歐

陽文忠公之矩度公之政事有陸宣公范文正公之志
節然政事非韓歐不施而文章非陸范不能也各舉其
盛者而言公蓋兼而有之矣嗟乎古之君子其學也內
以脩身外以治人所學彌高則所治益修而成功益崇
是以建立於世則天下被其澤今之所謂儒者幼而學
之仕則棄之故從仕數年比之進取之初固已大異矣
安能有所樹立而厭滿生民之望哉公立朝為才御史
居臬為能按察登臺為賢都憲臨邊為名方鎮所至政

聲赫燿澤被生人良由其學有所本不以既仕而棄故著於文詞者如此其美而又極其富也其傳於世也尚何疑哉公齒方壯強德業之修藻思之運日新月盛媿予言不能文姑承雅命引諸篇端以復至於續集尚有俟於大手筆也

送應天府通判林君叙

宣德中始建萬全都司儒學於宣府及今幾三十年矣一時游於斯者固多英俊之士而策名科第嶄然露頭

角者則有林君孟暘孫君良佐為傑出焉良佐尤非孟
暘比良佐中春官貳榜就陝西咸寧學諭以行獨孟暘
不安小成必欲取進士高第以償素志每戰輒北益礪
不衰孟暘不特精舉子業尤工古文辭善筆札所謂莫
邪為鈍鉛刀為銛卒不能與主司合非命也夫然夜光
結綠自有定價宣城人士歆其德範珍其辭翰莫不爭
相愛重行孚於鄉亦云素矣今年選期當及天官卿不
恤其志驟使就試寘諸前列遂拜南京應天府通判職

司馬政孟暘於此蓋有不得而辭者矣雖然進士出身之階耳得與不得惡足為孟暘輕重哉或者以為孟暘之志得進士則立朝著登法從足藉是以行道今居京輔子黎民有不足以行道乎吾知孟暘之志亦遂矣夫問國之富數馬以對是知國之強弱虛實兵之勝負盛衰胥此焉繫豈細故哉是以國家於天下郡邑廣為孳牧任之必擇其人專其職久其任而責其成功所以求國馬之蕃息也欲致蕃息豈無故歟嘗觀衛文公秉心

塞淵而致駉牝之多魯僖公所思無疆而致駟牡之盛大抵立心深遠者措之事業無適而不善也馬政云乎哉若孔子為乘田則牛羊茁壯及其相魯則強公弱私政化大行百里奚爵祿不入于心故飯牛而牛肥及其相秦則顯其君於天下可傳於後世一皆是心之所為也孟暘行誼著於鄉閭學邃於己德性溫厚用志遠大茲往南都以是心而莅政臨民則善教之所感仁聲之所及必翕然從化樂然敬服而皆畢力於乃事矣致國

馬之蕃息也何有哉若夫牧事有成朝廷寵以峻擢隨所任而善其事業又於異日見也不誣矣孟暘將赴官平昔交善者徵予言以華其行予應天之編氓也遙為吾郡得人賀用為序以贈之

泉口竺氏族譜序

昌筠竺君自什伍長以軍功累陞宣府左衛副千戶讀儒書性朴固才良行端事凡有室於理者弗肯為也總戎大臣以鈇鉞來鎮上谷者皆敬禮之延置幕府與籌

邊計俾署行軍斷事裁決得宜言輒見聽未嘗依勢作威倚法以削也年甫逾六旬以老謝事家無餘資簞瓢屢空惟以清白遺子孫此其志也嘗出宗譜一帙示余要一言以叙竺之先本姓竹後因避仇乃加二畫而為竺後漢竺晏嘗為擬陽侯此可考見者也南宋時有九十者家富族盛始居紹興上虞之牛步稱牛步竺世九者分居嵯縣之靈嵒稱靈嵒竺世十者分居明州之泉口稱泉口竺今寧波奉化之泉口是已九十一者生一

子諱廷振理宗時貢元廷振生二子曰奇一奇二奇一
生二子曰尚一教諭尚二處士尚一生五子曰與一教
諭與二處士與三教諭與五處士與六學正尚二生一
子曰與四學錄其與三教諭本尚一子出繼尚二後歿
墓本里厲家山者昌筠之曾大父也諱顥生處士歿墓
本里金雞山者昌筠之大父也諱大懿洪武中謫戍上
谷卒於保定藁墓宣城東今以昌筠貴誥贈武略將軍
宣府左衛副千戶者昌筠之父也大懿自離鄉井間闕

轉徙艱苦備嘗而能篤意於宗譜慮後世子孫昧其所從來不知出於奉化之泉口也乃自述其世系之詳復為圖以明之時昌筠尚幼舉以授之其有望於昌筠也至矣昌筠果能成立不負所望什襲保藏裝輯成帙所至携以自隨復加增修罔有遺缺使若趙伯魯之簡不猶斷港絕潢而何據以窮其源乎茲焉賴是得以知其上世官業之傳書香之襲其來者遠則昌筠今日仆而復興微而復盛而克紹簪纓之美者豈非世澤之深長也

耶嗟夫杞宋之文獻不足孔子惜之魯國之分器不守
春秋譏之今竺氏宗譜大鑑作之於前昌筠述之於後
父子一心傳守弗失可謂克盡尊祖敬宗之孝者矣竺
氏之子孫抑何多賢也歟昌筠旦暮將畫錦南歸持是
以往訪其泉口宗族墳墓之所在百年之系離而復合
足華其宗而慰其祖矣是為序之

北庄雅集詩序

宣府前衛戶侯張銓孟文甫有庄在北城外五里許土

壤膏沃歲入頗豐足以供賓祭之需山勢蜿蜒環抱如拱如揖其前則有柳河水自西而來縈迴東注瀉如玉虹湛如素練而此庄實據其勝蓋佳境也天順癸未正月望日適當元夕帝京火城金吾弛禁上谷雖居塞垣而邊塵不飛蕃方無警傾城士庶亦皆燒燈張宴以樂太平之盛蓋佳時也時孟文置酒在庄上請予往遊偕行者則有吾同輩謫宦諸公以及儒宮士友皆文雅之流而無介弁之雜蓋佳賓也既至邊豆具陳盞斝交

錯物備水陸之品座無絲竹之誼蓋佳會也夫以佳境
遇佳時合佳賓而預佳會則觴酌笑談歌嘯洽得不
暢佳懷也耶於是酒酣耳熱諸君子多有所作盡醉乃
散翌日孟文來需子言以紀斯會之盛子以為君子所
遇不同貴乎無入不自得今吾輩寄身邊野皆順時安
命略無離憂旅戚以自隕獲况孟文尚禮好客雖在軍
旅不忘俎豆殆有祭征虜之風焉情分之相契燕樂之
相親宜乎諸君子爾汝之相忘發為詠歌不自覺其懽

然而成什也嗟夫良辰易往盛筵難再則斯會也可無述哉因叙所由於羣玉之右

高昌家乘後序

高昌家乘者乃宣府前衛指揮同知高公偉所修者也偉生於遺腹譜佚不傳得元奎章閣學士虞文靖公所撰高昌王世勲碑為據始有統緒輯成是譜今其孫寧亦生於遺腹嗣為本衛指揮同知以戰功陞指揮使於其家乘自祖偉而下既已續書欲于一言以序考之高

昌有國居西北輝和爾之地在元魏時有名曰布克汗者生於木廕遂為其國君長寔高氏之始祖也傳三十餘君在唐時是為伊囉勒德濟其子格埒勒德濟徙居交州又傳百七十餘載在元時是為巴哩珠阿勒坦德濟伊都呼伊都呼者其國王號也舉國歸附太祖仍為伊都呼卒子諤格勒德濟嗣卒子茂穆爾德濟嗣卒子和爾齊哈喇德濟嗣卒子納琳德濟嗣封為高昌王卒子特穆爾布哈嗣卒弟齊吉嗣卒兄子布達實哩嗣卒子華善嗣

在我國初舉國歸附為立高昌衛拜為高昌衛指揮同知仍統所部賜以世襲誥命卒子偉嗣即修譜者也累調宣府前衛卒子永早歿而寧嗣嘗觀自古有國之君易世革命澤微流遠子孫降而為庶者不為少也今高氏肇自木癭較之人迹馭卵之事尤為神異所謂麒麟蛟龍之生異乎犬羊魚鱉蓋天實啓之而非偶然之故也是以奕世載德有土有人彌遠彌盛至歷千數百年之久而傳珪襲組澤流無替始雖本諸天而所以培植

承藉之者未嘗不存乎其人也寧字太清美軀幹英毅
沉雄勇於有為而讀書好禮循循雅飭用能保歲是譜
重加修定敦本厚倫仁也尊祖敬宗孝也不賢而能然
乎其光前而燾後又寧有涯乎為不辭而書其後

送太常李少卿獻績朝京詩序

國家大事在祀與戎而祀事之奉所以報本反始達天
子之孝敬交神明而通肝鬢和陰陽而遂萬物事無大於
此者况南京為國家根本重地天地山川社稷之壇墠

在焉高皇之陵廟在焉歷代帝王國學先師及開國功臣之祠宇在焉與夫祀典當事之神時有所祭月有所薦皆隸太常所掌自非清德雅望精白一心者惡足恪承祀事而致神明之昭格哉遠者不暇及姑即正統間言之若冢宰魏公雍言鄭公學士金公皆以弘材碩學為卿於茲豈惟禮備樂和祀事脩舉一時道德文章蔚然為士林所歸重諸公既去繼之者鮮用儒流是以內乏格神之德而時不順成外無及人之善而士不歆仰

寥寥久矣聖天子嗣統之初首嚴天地百神之祀適南
京太常卿佐以缺聞詔簡儒臣補之於是天官內閣重
臣咸謂翰林侍讀李君立之為宜遂以應詔乃輟經筵
史事與地官正郎陳君同擢為南寺少卿君勤慎端介
脩明禮樂嚴恭祀事罔有怠忽其精白一心誠足對越
神明而無媿者也未幾陳君召還為地卿而季爵夏君
又以大理少卿轉秩而來諸君皆起進士弘材碩學伯
仲頡頏道德文章士林歸重頓復曩時之舊地因人而

勝不其然哉茲立之三載書滿獻績詣闕縉紳多為詩
以餞其行夏君以予與立之有舊寅之雅屬叙簡首予
以謂翰林太常皆士君子養德之地也翰林以文字為職
太常以禮樂為任皆無政務之累者也以其餘閒沉酣
載籍窮探聖賢之奧博究古今之變足以極其學力之
所至立之之學之德昔之養於翰林者已久今之養於
太常者益大由是而置諸密勿之地其經邦弘化豈不
能堯舜其君民也哉君之往正當國家願治之時羣賢

彙征之日館閣諸老又皆君之知己為朝廷倚毗以天下為已任者君往參焉以輔理宣澤流溢四海使予沾溉餘波仰觀聖君賢臣之事業於蓬藿之下雖衰朽荒落亦能勉效漢之王褒宋之石介作為詩頌以詠歌太平之盛不徒老死丘壑而已也相見故人為我謝焉

容臺別意詩序

舜命伯夷為秩宗命夔典樂今之太常即其任也命皋陶作士明刑以弼教今之大理即其任也夫典禮樂以

事神明刑以治人而必各專其任者其亦因其材德之
所宜歟仁和夏君季爵以進士拜官秋臺擢丞大理進
南寺少卿丁艱起復轉南京太常其居大理也訊鞫詳
審讞決平恕嘗著明允之效及居太常也精嚴祀事統
和神人復著寅清之美是則古人各專其任者君則兼
舉其職矣其材德之施固無所不宜哉蓋君博綜羣籍
該通典故謹持三尺練習憲章故能隨地而著其績也
茲者朝廷澤覃四海寬刑肆赦以承天意恒慮斷獄或

有未中而南寺正卿久缺念公昔在大理奉法守正風績素聞遂擢為正卿俾輟禮樂之司仍踐明刑之任則其已往之效簡在帝心有可見矣命下將往視篆同寅李君立之暨諸寮屬感君德誼相率賦詩以贈合而命曰容臺別意屬弁以言惟夫上天眷佑我國家生賢輔治濟濟其盛然文學吏事各負所長鮮有能兼焉者也兼之者僅見於君斯非天獨厚之以為一代之良弼乎今朝廷慎於用法亟於求賢而惟公是擢公仰副從欲往俾庶獄

一清將見人心悅服和氣自臻躋世隆平致君堯舜隱
然為時名臣而擅皋陶夷夔之美於今矣諸君之詩珠
聯玉綴頌其德業榮其恩眷非直叙其別意而已予故
為序之以附於大雅崧高烝民之什云

湘江春雨竹卷引

古之善寫竹者唐則蕭悅宋則文與可元則趙松雪李
息齋諸人皆能以藝名世以予所見不過獨幅數竿而
已未有相連數十幅相聚千萬竿若是卷之富者也若

夫湘江乃多竹之地延之以洲渚潤之以風雨其山迴
水繞之勢淋漓潺湲之態亦未有若是卷之曲盡其妙
者也蓋姑蘇夏公仲昭以進士起家學贍才高精於書
翰拜中書舍人時錫山王孟端與公同官以墨竹妙天
下公從而師之盡得其傳下筆輒臻其妙鞭材日聚遂
擅出藍之譽四方之人得其一墨競藏去以為珍玩後
公遷吏部郎官出守瑞州入為太常少卿名德日重公
每自靳意有不合求之或不可得遇嘉朋契友雖不求

有得意筆則舉以遺之子舊辱公愛嘗記與公遊武定侯家圃見其卓石甚奇語子曰聞子使朝鮮得其佳楮肯見遺乎子曰諾歸遺二番越數日乃作墨君遺予下帶坡石細視之乃圃中所見也公笑曰吾豈欲楮乎特為米芾圖石丈也其風致高邁如此今為同寅李公宗周作湘江春雨圖後序云宗周雅好書畫適興琴棋與予往來甚久索予墨君未能酬之又云今年夏公事頗簡雨久不出故為作此則公與宗周情契允合重其清

尚故揮毫命意致多且妙如此豈易得哉一開卷間莫非篆籀波磔之法其水石陰森枝葉茂密恍若倚烟蓬而弄水雲度三湘而望九疑不覺神爽飛越塵襟蕩滌則是卷留於天地間尚何讓於古人也哉計公平日所作似此卷者當亦無幾公茲已物故此卷誠何可得宜宗周之寶愛之也間出示求題其端慨念疇昔為之惘然

倪文僖集卷二十一